

四庫全書

集部

欽定四庫全書

集部

樂圃餘藁卷一至五

詳校官庶吉士臣吳烜

侍讀臣孫球覆勘

覆校官中書臣宋枋遠

校對官助教臣羅萬選

謄錄監生臣姚培敦

欽定四庫全書

集部三

樂圃餘藁目錄

別集類二 宋

卷一

古詩

卷二

排律

律詩

卷三

律詩

卷四

律詩

卷五

絕句

輓詩

卷六

記

卷七

序

題辭

卷八

啟

律賦

卷九

世譜

書

題跋

祭文

銘

卷十

墓誌

臣等謹按樂圃餘藁十卷宋朱長文撰長文
字伯原蘇州吳縣人未冠登進士乙科以足

疾不仕築室樂圃坊著書閱古蘇軾等薦起
本州教授召為太常博士遷秘書省正字生
平著述甚富所撰詩詞賦辨表章雜說凡百
卷號樂圃集南渡後盡燬於兵其從孫知漢
陽軍思哀集遺文得詩百六十有三記五序
六啟七墓誌五禱文六類為十卷又以墓銘
表傳等為附錄一卷鈐諸木歲久僅存寫本
康熙壬辰其裔孫岳壽重刊行之附補遺詩

一贊一則明嘉定陸嘉穎所蒐補也稿中墓
銘或署其父公綽名銜蓋長文少作從石刻
中錄出者亦可見思當時搜討之勤矣乾隆
四十一年十月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

樂圃餘藁卷一

宋 朱長文 撰

古詩

公堂置酒羣彥咸集作詩呈學中諸先輩且用

叙別

漢有郡文學儒宮所宗師稚圭雖歎滯鄧禹猶願為聖
朝興庠序內外振新規嗟余介且拙性與邱壑宜青山
起泮水六月開辛夷經術聊辨惑文章非振奇羣英何

濟濟屈就董生帷講習良可樂敦學交相資但觀芹藻
長不卹顏髯衰忽傳太學命飛詔下天涯自省草茅賤
豈稱廊廟知親友頗敦迫黽勉趨官期生平好古心或
冀伸此時偶茲春奠畢將與諸生辭濁酒多如澠頒貺
自守麾鄉飲久不講禮意猶可追高閣矗丹檻公堂煥
雲楮袞衣二百衆齒髮叙尊卑籩豆儼在列鵷鴻來有
儀珍饗薦瑤觴雖醉尚肅祇式燕固云喜有行尤愴離
勉旃重勉旃脩業戒荒嬉黼黻在德義金玉惟詩書豫

章生拱抱羣木共歲筵養之得其性自有凌雲枝又如
剛澮流不息趨天池居鄉為閔參得志慕臯夔當令竹
帛間炳炳令名垂

佳雨應祈因昔年諸友作詩今再叙舊

晏侯昔為州歲旱慶霖雨夫君與方子吟思共清苦不
才輒繼聲玉石愧同處賡訓自邦君高詠編幕府開編
讀英辭風義恨修阻歷年屈指八閔守今已五

自晏易
五守

溫溫劉蘇州

謂夢
得

揚仁美風土篇章極清新操行到淳

古去年掌膠庠幸此廕德宇遇君來自西暫作臯橋旅

謂公權

並游盍簪裾良宴陪樽俎辱顧眼俱青言詩多見

與近當庚伏間不雨病禾黍田乾如龜裂一溉勞遠取
如惔沴氣生望歲羣心沮園居雖閒曠何處逃蘊暑使
君憂憫深雩祀以時舉精誠禱祠下若與神告語隨車
油飛雲闔境膏澤溥稿苗興腴原涸轍通別浦萬輪水
可汲千笠草務去私禾與秬稻指期入我庾清暉登谿
山餘潤滿林園中吳垂白叟買酒相忭舞掃石邀良朋

清風快談麈此時無一詩懽意何以叙朝家日隆平二
聖保基緒施仁塞天淵敷政皆堯禹舊臣留旦奭新相
拜房杜風和調舜琴俗厚空周囿銷變召泰和協氣應
律呂吾儕夙承學嘉慶幸親覩相期美康平復見頌多
稔

次韻送毛正仲太博赴召

馬周起布衣一日見紫宸獻言中機會數歲持衡釣歎
息慕前哲誰能繼清塵毛公東南美迴掩竹箭珍高才

與精識卓爾出天真論政明得失談兵到機神天戈討
梅山婉畫昔已伸一官遇賢守相與康吳民孰云芙蓉
幕人卧五色麟聖君馭羣材功業圖日新旌麾頗牧用
帷幄良平臻奇士求即至當世有偉人君今赴明詔亨
會在此辰夕發碧江外秋過清汴津彤庭敞神麗文陛
高嶙峋良籌上意合深策廟謨親功名立少壯富貴將
追身我亦有志者卧疾松陵濱耒鋤代長缺韋帶比華
身高懷未遐棄荒徑枉朱輪纚纚聽君語懦夫氣益振

病騶觀逸驥舉首嘶鳴頻尚期居要路迴光及幽淪

轉運少卿生日

昔在章聖朝先君為名臣入陪儒林老出擁使者輪忠
謨與休烈萬世永不泯惜哉未大任天意昌後人公生
韞俊德磊落功絕倫深林有條梅不揉自可珍外隅正
以方中府粹且仁沛然施之事迅若般之斤自聯金閨
彥頡頏三十春牙籌折經費龍節綏遠民竭來天畿東
威譽薄海垠羣情無遁照衆理日益勤吏徑皆敬闢敞

根悉鋤耘惻惻舊鰥寡今也皆不貧闔部數百城膏澤
一以均正月方在浹是日為生申東人競祝公百福叢
于身同宗復荷德善禱乂所陳况公方耆艾百行享明
神俾公永且康筆端扶化鈞俾公熾而大膝下森華紳
近得舉之躅荆南侍郎前望伯虎塵朱虎先閥期益顯蹇品庶
可親

送魏君致遠之吳興兼寄祝修中

庠中今多材燦若荆岫玉琢磨觀粹美尤愛魏與祝二

予幼相友共學橫山麓抱書來泮宮美質異碌碌文辭
堪適用光瑩輕縑幅前年掇高選麗賦人爭錄吳興太
守賢好善下白屋貽書勤聘禮掃榻待英躅伯樂過冀
北所顧皆驥馱翩翩告別去舟泛苕溪淥南陔急親養
聊以奉水菽愧我不能留噫噫想鴻鵠良辰振六翮一
舉聳羣目雲漢期高翔稻粱非所欲

少章過吳門寵示淳夫子瞻唱和并惠山寄少
游之什俾余繼作輒次二公韻以寄之

懷友對華月身如匏繫何遙聆金玉音悵望江湖波憂
來誦三篇調飢餉嘉禾蘇范天下賢閱士歲月多憐君
似蘭芷長育瑤山阿良工得寶璧韞櫝加琢磨發為驚
人語九曲傾洪河蟠蜿寄短章浩蕩寫長歌一官得武
陵萬景盡包羅又如彈響泉餘韻清且和籍湜師韓文
其則在伐柯俯視枳棘間翔鸞宜蹉跎聖朝頌聲作周
雖與商那二公且大用豈得歸岷沱

詠齋偶書呈子通無隱

夙志在蕭閒獲此幽遁迹喬林無冬春蒼靄異晨夕旁
窺疑好峯俯瞰驚峭壁浩然溪山興盡在陶潛宅杖藜
行水邊萍際湛空碧良魚不輕游弱羽猶自惜吟髭不
禁霜曉鑑見早白古人已深歎信是林園客遣累假禪
鋒陶情任詩格寄聲招友人來看亭前柏

次韻李子功留別之作

采蘭無復養嬰此終天悲家空弱妹長恐失桃夭時翠
蔓倚長松之子得所隨銜枯歎相遇摻袂傷顰離洞庭

春風高楊柳綠江渚柴門歸獨掩桂楫暮何之眷眷厚
有餘佳什猶見貽散帙渴精論言詩佇良規惜哉片帆
去快若駟馬馳東臯多樂事歸計勿遲遲

謝虎邱祖印相訪

支嶺高風遠村山佳句稀雲巖有開士詩理到精微不
知蓬戶隘未勌金鑲飛忘形任談笑敷衽評是非近師
宣城老遠慕蘇州韋我亦有吟癖古人思與歸願聞碧
雲篇所得如珠璣漁樵早晚出乘興叩禪扉

謁郭道冲唐師德登臺偶作

衝寒步郊原煙水照林薄雪餘山色佳浦浚湖波落靜
可釣綸垂清欲塵纓濯相逢兩俊友辭義富金腹攜手
登高臺談笑有真樂寸眸周遠近幽思騰寥廓逝將飛
片帆直到洞庭脚繫維阻並遊搔首向城郭

春秋終講伏蒙知府諫議臨視學舍燕勞諸生
謹成小詩敘謝

泰山先生久冥寞世把春秋東高閣腐儒退隱三十年

獨玩遺經思筆削濫居師席愧匪才日演微言更歲籥
欲遵廣路視堂奧誓闢浮雲窺碧落茲辰講解告終篇
敢屈邦君親視學邦君舊現補袞才忠論嘉謨動宸幄
密為福澤徧寰瀛暫得麾符出京洛愛民如子不忍傷
政用中和屏威虐深惟教本在庠序力助儒風止姦惡
羣材僅得就長育百堵何為憚興作兢兢饗舍盡修嚴
翼翼公堂驟清廓已欣華構將落成肯枉雙旌率僚幕
清晨初謁二公祠重道嚴師致恭恪更忘煩暑臨講席

自降威容聽揚推
犁肥酒醺宴友生
金印煌煌對褒博
傳聞長幼相告語
爭誦詩書親教約
歡聲四出屏陰沴
雲霧俄收日華爍
爍爍久雨是晴曦
文翁化蜀士皆成
魯侯修泮民思樂
自慚傳道竟何補
祿食充飢免藜藿
幸逢賢守善承流
喜與吳人醉優渥

樂圃餘藁卷一

欽定四庫全書

樂圃餘藁卷二

宋 朱長文 撰

律詩

雪夕林亭小酌因成拙詩四十韻以貽坐客昔
歐陽公與人詠雪先戒勿用梨梅練絮白舞鵝
鶴等字今篇中輒守此戒但愧不工伏惟采覽
極望鋪千頃平觀徹九霄縱橫隨物象合散委天
飆洒竹聲微動粧松勢不搖庭空飛鳥影窓失
遠山椒釣罷

盈孤嶼行稀覆小橋爭先籠碧瓦騁巧綴柔條片片誰
裁製團團似琢琬邱陵平坎險草木起枯焦皎潔那容
染輕清祇自飄來便幼穉披去羨漁樵蓬冷孤舟泊
蹄輕逸驥驕危樓明皓皓虛室靜蕭蕭餘霰霏殘夜層
冰結霽朝界疑華藏見境入洞天遙嚮晦終難掩居高
却晚銷潤滋甘井脉寒減暮江潮思婦啼紅袖征夫擁
皂貂履穿愁踐足心悟任齊腰就映猶開卷頻餐愈病
瘳袁公當獨卧謝女尚能謠旋取茶鐺汎多收藥匕調

任令埋蠟屐直欲鼓蘭橈埽處迷三徑吟餘凍一瓢因
思良友至急走牧童邀池館增蕭洒盃盤奈寂寥壺中
聞笑語物外觀風標真樂非絃管竒辭脫篆雕紅塵蕩
滌盡夙酒等閒消燭映凝膏淺香清切柏燒談圍終易
解詩將可稱驍聞道羣賢集方從五馬招黃堂催盛燕
緹幕會英僚海氣連平野巖光滿麗譙繽紛霑壽斚
晃照華鑣劉白才名重枚鄒筆力超袴襦歌美政牟麥
慶新苗畎畝深盈尺風雲會再缺賀聲周四境瑞奏達

中朝郡國仁風遠乾坤協氣饒年年書大有擊壤望唐堯

仲春上丁知府金部躬率僚寀釋奠于先聖既而升公堂命學官講書竊惟中庸之篇自安定先生常以是誨人閱歲既久嗣音者希某孤陋無似竊慕前哲其啓講也今龍閣黃公嘗臨之其終講也金部使君又臨之羣儒在列咸與榮觀輒成五言律詩二十韻叙謝

天意紹斯文成書在聖孫一篇窮妙理萬古誦微言美
行敷華葉精誠固本根並明參日月幽贊極乾坤奧義

誰鑽仰真儒善討論

謂安定先生也

披雲觀泰華行水自崑崙

庠序非才處詩書素志敦崇朝羞倚席暇日廢窺園辨
惑開羣聽潛心到本原意將追往昔學豈為專門盛府
連稱治耆英繼典藩始終臨講席前後枉高軒全帳羅
金鼎盈庭倒玉樽旌旗來有慶衿佩寂無喧士識師資
貴民知道義尊僖公史官頌鄭校相君存芹藻歡欣意

陵阿長育恩中材多杞梓寶器列瑤琨五紀登朝威羣
英著籍繁美哉文正學遺澤洽元元

奉送中散使君提舉崇禧觀

方面威名久朝端聞望隆需章祈玉陛寶詔與琳宮
將均勞逸高情保始終他年黃髮老清世紫芝翁迹放
風波外心安夢幻中身輕隨壽鶴目極遠冥鴻祖帳羣
公集啼嬰萬俗同何緣留名父無路達堯聰誇里金龜
重榮先密印崇高堂羅俎豆幽徑剗蒿蓬趣健歌歸去

因閑味道冲謝庭常有慶越索任令空醉帽歌華月吟
髭動好風翠虬喬木老錦帳海棠紅平昔高軒過深嗟
陋巷窮噓枯言不絕推轂賜嘗蒙載酒邀彭澤名鄉表
鄭公量才如斷木荷德重維崧耆俊方圖任明廷正納
忠劇藩如擇將猶恐起宗工

光祿生日

卿寺方生棘侯邦屢建旂才鋒周物理智燭見神機壽
遠眉毛秀身康髻雪稀翠筠高挺節古柏暗增圍雲陞

朝升對銅符夕佩歸灌苗潛致茂針瘼坐令肥名杜名
方重松喬志所希非才學詩禮多幸奉庭闈葉載神龜
隱雛隨彩鳳飛晨昏趨膝下永著老萊衣

次韻司封使君和練推官春望之什

目極江湖近心存象魏遙未調金鼎餽新泛玉觴椒賦
為凭攔得憂從散帙消高才方謝守輕舉羨王喬桃結
千年蕊松抽百尺條天涯舟一葉風送逸漁樵

送知府滕光祿

榜登龍虎亞掄魁一紀橫飛長憲臺謨議軒昂開日月
辭章雄偉鼓風雷朝端已慶明良會廟論咸推將相才
一跌雲衢成老大幾遷方面歎遭迴致君事業看霜鬢
經國風猷付玉盃驅弩屢驚園令出引章還喜買臣來
展墳乍覺青松長視學追懷絳帳開榮滿江山增氣象
仁霑里閭舞兒韶齊雲晚詠難留白

白傳將去蘇有齊雲樓晚望之作

綠野新居欲繼裴淮海巨藩雖重寄傳巖須起作鹽梅

喜雪上太守

築壇精禱意通神
零雨先期澤此民
驟作六花猶及臘
更遲一日即回春
斜飄燕寢初驚密
平壓高樓漸喜勻
千里山河忘險穢
十門坊墅絕埃塵
謝庭賀燕凌晨集
郢曲歌聲遇景新
細入吟窓粘凍筆
輕隨舞袖落花茵
膠舟漸進危檣遠
汲井彌甘短綆伸
遍擁枯根蘇杞柳
巧粧寒葉活松筠
終朝訟息延佳客
幾度年豐達紫宸
力可回天消旱暵
為霖豈獨傳巖人

上運使陳兵部

屈指西州當世英我公傑出久知名自從揚馬奇才後
又得岷峨靈氣清剛者近仁今始見惠而能政古難并
胸羅萬象縱橫壯目悅羣情黑白明已借牙籌安右輔
尚留金節壓東瀛片章馳上雲霄動一檄飛前草木驚
斷割劇繁如簡易鍼砭瘦瘠使豐盈此時阜俗資良策
匪夕疇庸在老成竊愧衰姿毗太府幸逢雅量庇寒生
欲祈陰施增仙筭幾見蟠桃結子榮

蘇學十題

并序

蘇學昔有十題曰泮池玲瓏石百幹黃楊公堂槐辛夷石楠龍頭檜蘓水檜鼎足松雙桐是也或云蘓子美命名然篇詠莫傳殆有其名而無其辭也余頃至學中訪所謂十題者其存有六而龍頭檜蘓水檜鼎足松雙桐亡矣蘇學故南園之地南園者錢元璪之所作也錢侯好治園林築山浚池植異花木充其中未久歸于國朝百年承平之間萬物茂遂得桓其生厥後割南園之巽隅以為學舍遺址餘木迄今有存

者而建學之後繼有培植然間有為風霆之所偃拔
卒隸之所摧毀甚可太息夫亡則已矣其存者當為
之珍惜因取六物又益之以多幹柏並秀檜新杉泮
山復為十題題各有詩以傳來者庶幾觀是詩而愛
其物勿翦勿伐則騶虞之仁行葦之厚見于學校之
間矣豈止孔明廟柏攄少陵之幽憤太清仙檜發曼
卿之竒藻好事博雅為之嗣音元祐壬申正月十有
四日許州司戶叅軍充蘇州州學教授朱長文

泮池

怪石鋪幽麓芳塘倚茂林冷光開玉鏡清影滌人心
芹藻無傷性龜魚各就深泉源應不涸何必傳巖霖

玲瓏石

巨浪洗蒼玉一峯飛我前鑿開混沌竅窺見滄浪天
洞敞延華月巖虛生翠煙幽軒相對久古意日翛然

百幹黃楊

寶幹多材美孤根一氣同春餘花淡薄雪裏葉青葱
蕃

衍非人力堅剛稟化工寸枝裁玉軫可助舜南風

公堂槐

五紀栽培後三春長育中靈根蟠故國密葉蔭儒宮
與般斤遠歌宜魯藻同先儒垂意遠期此出三公

辛夷

楚客曾留詠吳都獨擅奇風霆存老幹桃李避芳時
名入文房夢一名木筆花功資妙手醫紫微顏色好先占鳳凰

池

石楠

昔年曾賞玩移自碧山遙古幹磨文石寒枝慰翠綃雖殊梗梓用終免雪霜凋來者宜珍護毋令困採樵

多幹柏

古柏列重門連枝若弟昆參天分直幹得地共靈根月照龍蛇影風摧鐵石痕鸞凰期可宿香葉向春繁

並秀檜

槃根幾百齡合幹倚冥冥偃蹇雙虬聳聯翩兩蓋青紫

鱗霜外躍紺葉雨餘馨左紐憑仙宇何如供泮亭

新杉

弱植還生意凌冬見後凋尚低霑雨露更長拂雲霄庭
月搖疎影簷風舞細條他年逢匠石寶構壯天朝

泮山

山形拱泮宮林壑意無窮自得千巖秀無虧九仞功光
延東嶺月清轉碧潭風官冷真相稱婆娑一釣翁

送曹縣丞入京

忠義家聲久夫君更美才吏民愁旣去交友約重來

有君

居吳之意別岫浮雲遠征帆曉月開棣華同郡府眷戀共銜

盃

次韻司封使君和推官早梅山茶二首

嫩跗黏絳蠟輕朶插珠鈿雪裏心偏苦花中達最先玉
階香馥郁煙野蕊聯娟託植雖然別黃金子並圓

柏葉元同翠桃顏未比紅留芳占春月弄蕊耐秋風自
稱階庭翫休煩帶幕籠佳篇補韋白流品重吳中

梅評事携詩過訪欲求屬和因次其韻

築室尋幽處唯求水竹隣心安何必貴累少莫如貧石
裏求奇古花中悟道新不須多轍迹猿鶴自為賓

次韻司封使君和練推官再咏山茶

珍木何年種繁英滿舊枝開從殘雪裏盛過牡丹時對
日心全展凌風幹不欹藥階如賦詠欠此尚相思

次韻練定公權垂訪樂園之什

隱圃甚蕭條驅車宜憚勞境從前代勝岡對遠山高林

曉猿抽臂池秋鶴浴毛興來頻就醉奇句僕離騷

賀林承務還吳門

朱顏充賦早蒼髯拜恩歸煙水鵲鵲聚霜穹鴻雁飛傳
經金耻富下筆玉藏輝貴仕毋嫌晚天門受賜衣

寄和晏守

二年懷郡印八度到柴扉曾未陪朱履頻煩友布衣水
邊孤鶴睡天際片雲飛拜德知何日煙霞戀翠微

和公權秋暑奉懷

誰謂雲中句能移江上峯清飈隨玉楮爽氣襲塵容劇
暑嬰多病嘉招恨未從眷言相與意深荷故情濃

再和

鄉校叨微祿家林傍舊峰散人那適用逋客拙為容良
友幸不棄華軒時肯從早秋須命駕荷葉露華濃

光祿生日

舜庭新遣牧漢寺舊名卿致主丹心在憂民素髮生鷺
峯仙桂老猿澗古松清金簡傳真理期頤體更輕

樂圃餘藁卷二

欽定四庫全書

樂圃餘藁卷三

宋 朱長文 撰

律詩

蒙使君召預池光之會

韋公池閣尚依然
賓主于今不乏賢
郡內欣逢兩耆俊
樽前喜會四同年
清談自可成珠玉
真賞何須聽管絃
燕罷旌旗搖暮靄
蔡經寂寞別羣仙

遊虎邱借前韻

一邱雖小勢巉然自古登臨歷幾賢門惹白雲常盡日
地藏靈劍不知年清歡相與隨雙旆幽趣誰能解七絃
每月來遊存故事郡中依舊有詩仙

次韻蒲左丞宗孟遊虎邱二首

命相將乘傳說舟愛山尋遍樂天遊先聲汶北安千里
選勝吳西賁一邱靜見隴雲生峭壁寒知海氣入危樓
鏘然佳句留蕭寺剡紙朝來賁此州

蓬島奇峯水四環何年涌出向人間清池不測通滄海

寶玉長存潤碧山曾致神仙留歎咏可憐軒冕樂蕭閒
謝公方為蒼生起戀戀煙蘿日暮還

次韻朱牧樂圃宴有感

竊祿都無簿領迷得錢邀客手頻携春來佳景迴三徑
雪後晴波滿一溪歲月易凋青鬢色塵埃難上白雲梯
煩君枉駕慙荒索空種梧桐待鳳棲

次韻彥舒席上之作

蒼煙寒水滿方塘插架排籤典籍場喜對七賢閑把手

希逢四皓醉飛觴林深迥出千齡幹

園中有千齡檜

詩就俄成

萬丈光逸興欲尋丁氏宅雲間老鶴共昂昂

奉謝司封使君晏公臨顧園居

閑卧林泉與世疎使君三度枉旌旗未陪徐孺升賓榻
敢屈文侯式敝閭顰擲魚竿絲半卷旋開松徑艸新鋤
愧無美酒拈巾漉難得金波款緒餘

未入柴扉即下車茅齋揮麈緩綸書不知銅虎威權重
宣責荷衣禮貌疎此日狂歌希魯望昔年能賦擬相如

篋中殘藁如傳後雖枉朱幡亦不虛

甘盤德業滿天區博學承家行有餘鳳翥頻觀先帝詔
牙籤新補相君書晨羊不飲康衢靜夜犬無聲獄犴虛
風績已應推第一鼇峰深處列仙居

次韻虎邱祖印秋日懷寄

不受紛華愛寂寥松風竹月共蕭蕭因隨野鶴過三徑
每對江鷗洗一瓢無復塵埃沾短褐尚思煙水泛歸橈
道人肯與羲之友飛錫重來莫待招

重九同子通遊虎邱與祖印三首

絕境良辰少兩全
稽筭莫倦到山巔
清談已可忘樽俎
真樂何勞聽管絃
才子就題黃絹語
高僧多誦碧雲篇
孤舟欲去更回首
天畔樓臺生晚煙

秋山寥曠景無涯
執手凭欄到日斜
地竦一邱容澗谷
天低四面納雲霞
凌風劇飲從吹帽
多病忘情懶插花
深美二難兄弟好
共將嵩壑占為家

浮世誰知金石堅
吟鬚俄頃見皤然
登山未免懷千古

汎菊相期保百年方外逸民猶有傳人間高爵豈如仙
良辰盛燕多遺迹何似江南五柳賢

彦和善談性理子文繼成偈句見要屬和謹次
韻

萬法都明一瞬中可憐情膜久相蒙浮雲映月元非暗
病眼生花本是空斷想求真猶未悟將心覓學轉相攻
誰能汲盡曹溪水莫負當年祖道東

彦和與子文相期卜隣子文作詩以遺謹次韻

仙才宜在道家山却學幽人欲閉關清燕曾陪明主問
羣言以助相君刪談圍莫敵書盈腹詩社相過酒滿顏
聞道卜隣同喜慰亦開荒徑待餘閑

次韻子文抱病幽居之作二首

幾年彩筆擅辭場髣髴相饒色更蒼千里舊聞稱驥驥
九霄安得接鸞凰醉凭淨几拋烏帽閑捲新詩置錦囊
治世莫將公幹比松陵風物勝清漳

好閑不復愛輕肥病起神清與道宜藥竈夜寒新焰歇

書窓晝寂竹陰移
坦懷莫學窮途哭
行已應無屋漏欺
里巷遊從須勉強
相逢猶記是童兒

佳雪應時呈司封使君三首

蘇臺風雨久如期
太守精神不待祈
萬廩更為來歲計
六花故就臘晨飛
靜裝松桂老深壅
芝蘭土脉肥
衡泌棲遲牆仞遠
為公何日賦緇衣

炫晃天花著物新
壺中萬景淨無塵
光輝只欲饒寒士
清潔尤宜比古人
韋白吟詩飄入硯
鄒枚燕處舞迴茵

明年霄漢橫飛去應踏繁雲拜玉宸

千里江山入郡樓凭欄乍喜密雲浮冷光交映天峯色
餘潤遙隨笠澤流民疊袴襦看不厭客叢簪履賞應留
野人乘興狂吟外引鶴披蓑上釣舟

次韻司封使君新歲喜雪

玉燭均調應改元賢侯喜雪望堯天

太守詩云王正首
此書佳瑞三見元

豐大有年暗聲撒竹高齋夜瑞彩連雲畫戟前千里湖山成

洞府萬家觴咏展賓筵應憐陋巷袁安卧擁褐孤吟又

過年

次韻司封使君立春紀事

碧瓦猶藏臘雪寒東杓初向斗旁觀雪隨華旦天京遠

雉舞條風野老歡

月令立春日
條風至雉鳴

官柳嫩黃迎皂蓋園蔬

新綠委金盤詩才例作姑蘇守一曲陽春喜歲端

次梅評事韻

滿目紅塵泪沒深誰能世事總無心買松野老栽成徑
覓竹山僧種滿林薄酒時斟資道氣好詩頻諷滌煩襟

鳳雛先顯門庭喜應笑陶潛責子吟

梅公書齋挂簑笠釣綸船
擲四物形於詩句余
為和之

快穢輕輪笠與衣閑將四物挂柴扉
江頭夜雪好披去
湖上春光宜棹歸靜處無憂嫌印綬
貧中有味勝輕肥
興來願借君毋恡渺渺煙波一葉飛

次韻公權子通唱酬四首

春晚遣懷

春華急似曉天星誰得年年鬢髮青
露濯淺深枝上錦風吹離合水中萍
吟餘金谷香隨步書罷蘭亭酒欲醒
擬把冽泉同一酌為君林下洗寒瓶

吳門懷古

九曲湮淪茂苑荒吳人誰復怨吳王
莫言故國千秋遠知是仙家幾日長
湖上只誇浮海相里中休笑傲顰娘
舊時幽徑今猶在但屬漁樵自採香

春日旅懷

身在塵勞未免憂傷春佇立碧江頭回腸只殢千鍾飲
方寸那容萬斛愁懶看錦袍凌巨浪好乘黃犢傍高邱
池塘得句頻相示直把珠璣為暗投

牡丹

竒姿須待接花工未必妖華限洛中應是春皇偏與色
却教仙女愧乘風朱欄共約他年賞翠幄休嗟數日空
誰就東吳為品第清晨子細閱芳叢

奉和司封使君春日回文之作

佳景更同民共樂俊髦皆集盛飛觴花隨客醉還成句
柳贈人行欲斷腸斜月上時霞散錦暖風來處寢凝香
華年惜過須心賞富貴叢身逼鬢霜

次韻司封使君程給事

通波隄上幾鞦韆花接遙山水接天故里松楸霑雨露
神都池苑隔雲煙耕桑交勸紅塵外羅綺紛遊盡舫邊
暫歇甘棠隨衆望不禁野岸更聞鶉
司封威篇甚有
思輒寓公意以賦

是詩

次韻司封使君和給事寒食城外感事

花如步障草如茵萬景繁華在此旬
金印誰來誇故里密章燔了賁慈親
莫看白髮興千感好共朱轡醉一春
俱是詩人兼富貴只疑元白是前身

吳門比月不雨司封使君深閔而精祈俄有佳
應謹吟成七言二首聊代謁賀

賢守憂勞髻欲霜通宵霖霖滿吳疆
五湖水濶魚龍喜

九曲塵清檜栢香

九曲路自胥門外至姑蘇臺

更入高鄉多擺捩雖

當淺處泛舸艍為霖事業傳家世澤潤應難限一方

一雨歡心幾萬家預期春稻博流霞低侵滄瀆田交岸

今歲低田畢種松江瀉海曰滄瀆也高傍支山水滿車葉幄謾霑桃李實

隄奩暗長芰荷花豐年闔境渾無事閑把詩毫放兩衙

樂圃餘藁卷三

欽定四庫全書

樂圃餘藁卷四

宋 朱長文 撰

律詩

知府司封見和喜雨詩韻陳謝

天意分明應魯雩
高壇晨拜紫袍濡
禽窺舊井寒泉長
魚泳新荷涸轍蘇
敏政有餘閑利刃
清詩無類擲靈珠
夏畦蒙潤秋臯稔
顏巷銷憂卒歲娛

送榮子揚齋郎

茹蔬酌水度清晨自是浮生潔靜身好事頻過三徑晚
愛閑惜別五湖春品泉暗識南零味鑒茗多藏北苑真
且著青袍居膝下少年未羨折腰人

次韻公權燈花

蘭膏未耗結花新花自無情喜在人生何輕籠先得地
開從細焰別裝春飛蛾雖遶光難掩夢蝶初迴色尚勻
更待玉堂清夜直賜來蓮燭影相隣

次韻俞子文南軒雨後

農疇已種圃畦青
高卧邱園自放情
客少不嫌三徑濕
年豐休歎一瓢清
殘鶯喜向風前囀
病鶴猶能月下鳴
千載令名如有得
莫愁軒冕老無成

次韻俞子文感事

我曾折桂向蟾宮
君有文華似彩虹
連蹇未酬平日願
嘯歌猶得故鄉同
不才甘作耕巖叟
有志宜為結駟翁
窮達由來都似夢
幾人曾是黑頭公

次韻楊彝甫見成甫裝縹舊書之什

儒者須看萬卷書古人精博固難如殘編莫惜裝褫費
舊迹堪憐繕寫初輕撥蠹魚文未損平齊緗表架無虛
白頭且更窮經藝誰道忘筌便得魚

次韻公權庾中成詠

坐局偷閑步小橋風隨秋葉過蕭蕭愁多萬斛量難盡
飲次千鍾困易銷笠澤狂歌方繼陸海門高隱莫如焦
焦光所隱在海門旁世謂焦山昔儒委吏猶堪處誰道倉公厭寂寥

喜公權仲逢垂訪

高軒相約訪柴關
蕭灑如君會合難
雨徑偕行穿履濕
風亭久佇袷衣寒
百忙好向閑中息
萬動宜當靜處看
公暇再來應不倦
東籬金蕊未凋殘

曉坐芻齋懷公紹

曉來乘興步高岡
便就幽齋作醉鄉
隣寺樓臺分兩面
一家池館得中央
南坡嫩橘寒傾日
北牖疎筠小帶霜
更待怪松擎積雪
莫辭訪戴舉瑤觴

次韻蘇文饒見貽之什

閒釣松陵閱歲多家林終日對煙蘿茹芝深隱慙商皓
獻璧求知笑下和靜送征鴻雲外翼吟看老桂月中柯
洛陽年少才驚俗車馬猶從陋巷過

次韻樞言龍圖得請洞霄之作

世間如幻此生浮寧典仙祠不典州決勝金城勲烈茂
宣風玉壘治聲優遠移遁跡無嘶馬舊得調元問喘牛
耆俊如公宜大用行聞召節趣蘭舟

平生氣節薄青雲不任機心只任真金為散多虛越索

衣從洗淨遠京塵吟隨猿鶴滄洲晚醉賞鶯花茂苑春
仰止高賢同里閭掃門羞未效前人

次韻公紹賀崇靜之賜金紫

北窓二紀傲羲皇節比淵明事更光共喜遐齡垂紫綬
莫嫌猛退棄銅章文房句就心常佚藥鼎功成壽轉長
七品官階三品服滿斟綠醕醉春陽

久脫朝衣襲野裳親逢盛旦日重光耕田鑿井堯民事
垂組懷黃漢服章諸老相懽陶聖治兩宮遙祝與天長

謫仙才調今誰是肯解金龜燕夕陽

次韻徐中散丙寅二月見訪之什

數年解綬隱林扉乘興頻來訪習池老似樂天兼少病
官如叔夜又能詩身閑幸與耆英接學淺虛蒙國士知
白雪佳章難復繼策駑追驥自嫌疲

祖母生日

挺生賢德對耆英歲物皆新氣淑清年至七旬人羨少
子為四品世稱榮紫泥屢捧門多慶華髮雖稠體益輕

欲比遐齡何所似蟠菴結實老仙京

判府曹宣徽生日二首

星杓指未月增弦神選良時協半千恭慎動遵長樂意

潔清能紹翼王賢

翼王平蜀克金陵秋毫無所取

緩垂相印淹公論堅

請州符避劇權四十擁旄非不貴更看黃髮珥貂蟬

盛世高門福兩全星辰粹氣萃為賢釣璜韜畧傳三葉

齋鉞風稜積十年陰德在人宜壽考清才脫俗恐神仙

寒儒欲繼崧高頌不獨生申但美宣

申伯乃宣王元舅

郡牧李侍郎生日

柱史仙翁舊指枝生賢左右太平基居留成就昭陵後
賜告從容故里時籌策又為當世重勲勞方受兩宮知
欲祈天錫公耆壽更過芳蓮葉上龜

當年弧矢設門闌英氣鍾於曲阜間名覆金甌新品地
香盤密印舊家山腰邊龜組光華動膝下龍駒禮法閑
五福俱全誰跂及流霞為壽日開顏

閏月丙子判府相公被制命升使弼越六月癸

卯公誕生之日

某

謹齋潔為詩二章拜獻左右

雖辭句蕪類不足奉揚盛德姑以述惓惓之誠

武德陰功積在民既生太姒復生申手提將鉞雖三世

身到台衡始二人膝下龍駒環壽斚日邊鳳使捧恩綸

公拜命又生日
恩賜者再至焉

沙堤築就朱衣引富有青春尚四旬

宣制初聞下玉墀又逢盛事協熊羆青霄靈鼎凝祥久

紫府蟠瓊結實竒養志曾添龜鶴筭避權重讓鳳凰池

公建節十餘年至
相位有表再讓

從今若校中書考屈指當如郭子儀

元厚之少生日

四紀勲榮動冕旒
倦趨黃閣傍滄洲
名如白傅身尤貴
才繼微之德更優
千載神龜巢葉穩
九霄老鳳帶雛遊
蓬萊水淺公猶健
輝照東南對斗牛

荅人見慶除博士

幅巾短褐對江雲
閑把群經自討論
魯泮未能開後學
虞庠豈稱講微言
羸駒久絕騰驤望
病木猶沾雨露恩
蔣徑雖荒陶菊在
徘徊惟恐去吳門

元少保生日

孟夏堯蓂六葉殘來從仙府瑞人褰幾年彩鳳池中浴
此日神龜葉上閑七老相懽惟將相二疏高冥欠湖山
羨公退自台衡地長在煙霞縹渺間

體貌方隆避政樞歸來袞繡耀東吳騎鯨才格從天稟
化鶴風姿與衆殊經國文章垂睿想濟民德澤感神扶
堂邊三壽高千丈依舊扁舟泛五湖

程給事新第

朱門不鎖走朱輪東省仙材畫錦人石上雲輕林屋曉
花頭露重洛陽春謝公綦戰烏巾靜裴令吟高綠野新
他日南園真可乞滿池煙水正相鄰

判府蒲左丞寵贈佳篇謹次韻

高文大冊耀天衢新句鏘金擲隱居廊廟方將歸輔弼
江湖猶復念耕漁百城草木知威望一代賢能入薦書

近日東南興節士旣旌吳子又褒徐

公旣薦吳祖求顯
于朝又作高士坊

谷口堂以
追褒徐復

次韻公權喜太守再留

不為機巧不求新坦坦襟懷任道真揭節二方陰布德
分符千里別生春兒童共喜重迎叟父老相懽許借恂
池閣逍遙無一事清風入座轉汀蘋

近承南康朝請使君寵訪林圃小酌至夜公權
特惠篇什謹次韻

枯柏森森覆小臺凌風采菊共銜杯東籬寂寞陶翁醉
連騎繽紛衛相來放浪五湖慙釣客均調玉燭仰璇魁

秋河半夜簷前轉誰泛仙槎去却迴

奉陪太守及諸公遊虎邱

何必襄陽孟浩然苦吟自可繼前賢虎邱合去十二度

見白熊軾再遊三百年雲閣為君追舊額

飛雲閣本名齊雲樓今追

復之霓裳從古播朱絃

白公在蘇作霓裳曲

此行不減唐人樂暢飲

惟無八酒仙

樂圃餘藁卷四

欽定四庫全書

樂圃餘藁卷五

宋 朱長文 撰

絕句

次韻蒲左丞遊虎邱十首

玉堂紫閣冠英游身作三公
未白頭須何鳳凰池上浴
豈容蕭散詠林邱

埽石捫蘿向上行
門前坐見白雲生
應思夢得多佳趣

獨宿樓中待月明

劉夢得登虎邱望海樓詩云
野僧已閉戶山月方出嶺

地近峰低俗慣遊不知絕景冠吳州從今合與名山等
左轄題詩翠嶺頭

羣山處處盡凌空未若奇峯隱寺中一夜便知名不棄
為傳佳句滿江東

萬丈澄潭挾兩崖削成奇壁自天開龍泉一淬名因得
不待秦王發塚來

劍池得名蓋古人淬劍之地
謂秦王求劍裂為池恐非也

層巒稍稍暮雲歸喬木森森衆鳥依再踏石花尋去路
畫船一隻帶斜暉

邱如蹲虎占吳西應得佳名故國時未必金精能變化
空傳怪說使人疑

海湧當年有舊山吳王侈葬倚層巒誰知國破邱陵在

兄弟幽居屬二難

乃王珣王
珣舊宅

西溪風月宜真賞東嶺煙霞稱苦吟他日黃扉勤論道

秋風一夢到山林

雲霞咫尺壓吳郊乘興斯須棹小舸欲往結廬嗟未得

羨他吳氏有三高

南史何求兄弟三人皆
隱世號三高嘗居虎邱

秋月乘興遊松江至垂虹亭登長橋夜泊南岸
旦遊寧境院因成十絕呈君勉且寄子通

綵衣幾度醉江濱今日重來淚滿巾惟有舊詩存屋壁
宜知投老負垂綸

前哲臨流猛拂衣身違憂患是先機非才自合居閑曠
不泛五湖何處歸

雲動鑑中雙槳飛天圍林外片帆歸欄杆倚遍日云暮
坐看丹霞生翠微

人爭軒冕安在哉我愛煙霞歸去來魯望有靈還見笑
更回城郭戀塵埃

兩山映日磨蒼玉萬頃涵虛皺碧羅不會樂天猶近俗

謾將絃管雜煙波

樂天嘗携
樂遊松江

長虹穩臥碧江心夢寐頻游覺莫尋
懽友相逢清絕處
酣歌一曲抵千金

漠漠秋煙冪故園沉沉暮色暝漁船
月華未出詩翁遠

樂事人間少十全

詩翁懷
子通也

銀潢倒瀉入滄溟
身近魚龍夜不驚
鳴榔空飛孤雁過
漁燈照浦一星明

茅舍蕭疎竹葦間
開軒處處面雲山
詩家不及漁家樂
坐卧湖光百慮閑

江裏鱸魚味不羶
江頭酒美滑如泉
長橋為席雲為幕
祇欠洪崖笑拍肩

華亭吳江道中偶作十絕

人間出鶴只雲間
相合仙經得亦難
塵外應多隨羽客

未教流俗等閑看

舟去舟來閱古今夢中憂樂累人深憑將一菊松江水
未洗塵纓且洗心

白日歸來皆有意平生事了最為難可憐萬頃煙波色
只屬天隨醉眼看

千古鴟夷節獨高脫遺富貴一鴻毛館娃宮女曾亡國
豈獨相携泛海濤

妖華傾國豈無情忍復顰眉見越兵若使將軍猶好色

安能三徙更成名

賢哲多為貴勢拘
人人空道愛江湖
誰將五鼎盈前食
肯換秋風一箸鱸

煙暝重湖日欲明
輕篷遙遞浦前聲
良魚好入深淵去
不為鳴榔取次驚

川上飛橋處處橫
幾回經此閱平生
碧蘆蕭瑟風前韻
一似家林霰雪聲

吹散青雲見好峯
家林祇在此山東
寄聲猿鶴休悲怨

蕙帳今宵遂不空

獨當家責性難堪五女同孤已嫁三更待人間了塵事
別尋雲外結茅菴

求筇杖

霜筠來自蜀山遙天骨輕清素節高我若得之如佩玉
君應輟此似秋毫

求虎邱竹

勁節難同衆草看根深更入白雲蟠園廬種此多餘地

為向西南斲數竿

舊說種竹須取西南引嫩根不然不生也

歸隱橋新成偶題三絕句書呈同志

樂園記改名招隱

幽居處處映煙蘿歸隱橋邊月色多
蟾桂有情憐病叟清光終夕照酣歌

挂却簪纓裹幅巾清流遶舍斷紅塵
小橋何用通來往猶為凝冬病涉人

逢人尚欲開松徑送客應休過筆溪

此橋下臨筆溪

林下有誰

頻肯顧春深好聽子規啼

詠齋三絕

泰伯祠邊舊圃開
半栽蔬果半池臺
閉門不放紅塵入
門裏清流自在來

塵冠寂寞更休彈
車轍荒蕪晝掩關
一片清暉長在眼
多情惟有四飛山

非山非市且優游
尚有塵緣未自由
巖下結廬應更好
石門西去近松楸

次梅評事韻

瓶盂蕭洒似村家任有贏金豈足誇
自入醉鄉頭不白
新詩何用祝蒼華

施柏花開招子通

桃李芳時不肯來
俄隨風雨落莓苔
齋前施柏花如錦
猶待詩仙醉眼開

青龍江上偶書兩絕呈無逸監鎮

潮滿溝塍稻滿田
暑天不雨自豐年
海商有貨官無擾
遊子爭來就一廛

卷綻初來海客船
脫身鯨浪見吳天
千帆總約秋風至
應助關征額外錢

海賈

千艘萬貨集江邊
爭較錐刀逐利遷
生理幸逃魚腹餒
夢魂猶怕蜃樓煙

陸寶山

陸家山色隱平蕪
文彩如虹照碧虛
痛爾臨刑思鶴唳
輸他謝病食江鱸

江浦

一川吐納五湖深
海裏三山何處尋
料得鷗夷從此去
古來煙水祇如今

次韻司封使君和程給事

勝地寬閑舊卜隣
耆年得意闢高門
中吳畫錦如公少
好作坊名賁故園

程公以其地右兩寺左南園置為宅基久矣近歲始成而未聞有坊名

次韻司封使君和程給事越來溪三章

溪色如藍照舳舻
越王金碧獻姑蘇
館娃宮裏長高枕

不覺舟師到國都

萬舸連雲載水犀
旌旗倒影蔽長隄
誰知數歲干戈後
不是吳溪是越溪

忠魂自逐滄波去
往恨空隨茂苑春
若使吳王思後患
屬鏤只合賜讒人

輓詩

英宗皇帝輓詞五首

仁廟規模遠慈闡教愛隆承平萬世策臨御五年功玉

鎖開天上金滕納匱中乘雲那復見陵拍起悲風

英斷能承祖慈祥善繼仁詩書教宗室禮貌待元臣損
已遲徽冊恭天徹步茵昔年平水患盡力在斯民

代邸推賢父甘盤授學精持盈周鼎重立長禹謨明仙
館靈芝秀嚴祠宿潦平歷觀唐漢盛未若廟稱英

鳳翼行將遠龍髯斷莫尋白雲留穆御黃屋宜堯心雖
享天齡淺終成睿筭深垂鴻須萬祀累葉奉姜任

有德三宗後無憂累聖間鳳當金粟翦龍隔鼎湖攀玉

凡言猶在霓旌去不還園林饒瑞氣東接永昭山

邵湘母

華屋辭榮養佳城合舊封浮生無定相衆善有遺蹤家
盛金籛在山長玉案重浮圖傳勝事實殿壯天峯

張虞卿

一臥東吳七十春區區南北笑鄉人盛開黌舍招英俊
敞闢華堂待縉紳婉婉重孫勝綵服煌煌兩壻擁朱輪
銘旌已去空回首通德門前舊是隣


林少卿

壽考安榮遇聖朝構成門戶自勤勞
閨中萊婦皆華髮膝下荀龍盡綠袍
堂有金羸身更約案披玉簡道尤高
人間厚福終歸盡漲海難停一夜濤

黃朝散

持心平厚勝澆浮仕路徊翔四十秋
政事每於談笑辦交親多向急難收
命由真宰隨窮達身在勞生任去留
舊治昔年應畫像龐眉聞訃淚先流

江湖嘗佩左符歸一臥漳濱素願違平日華旌過里巷
此時丹旆下巖扉羣峯拱揖開新穴萬木森羅長舊圍
佇看子門驅駟馬想應邱隴亦光輝



樂圃餘藁卷五

欽定四庫全書

集部

樂圖餘蒙卷六至十

詳校官庶吉士臣吳烜

侍讀臣孫球覆勘

覆校官中書臣宋枋遠

校對官助教臣羅萬選

謄錄監生臣姚培敦

欽定四庫全書

樂圃餘藁卷六

宋 朱長文 撰

記

樂圃記

大丈夫用于世則竟吾君虞吾民其膏澤流乎天下及
乎後裔與變契並其名與周召偶其功苟不用于世則
或漁或築或農或圃勞乃形逸乃心友沮溺肩黃綺追
嚴鄭躡陶白窮通雖殊其樂一也故不以軒冕肆其欲

不以山林喪其節孔子曰樂天知命故不憂又稱顏子在陋巷不改其樂可謂至德也已余嘗以樂名圃其謂是乎始錢氏時廣陵王元璪者實守姑蘇好治林圃其諸子徇其所好各因隙地而營之為臺為沼今城中遺址頗有存者吾圃亦其一也錢氏去國圃為民居更數姓矣慶厯中余家祖母吳夫人始購得之先大父與叔父或游焉或學焉每良辰美景則奉板輿以觀于此厥後稍廣西壩以益其地凡廣輪逾三十畝余嘗請營之

以為先大父歸老之地熙寧之末新築外垣盡覆之瓦
方將結宇而親年不待既孤而歸于是遂卜居焉月葺
歲增今更數載雖敝屋無華荒庭不甃而景趣質野若
在巖谷此可尚也圃中有堂三楹堂旁有廡所以宅親
黨也堂之南又為堂三楹命之曰邃經所以講論六藝
也邃經之東又有米廩所以容歲儲也有鶴室所以畜
鶴也有蒙齋所以教童蒙也邃經之西北隅有高岡命
之曰見山岡岡上有琴臺琴臺之西隅有咏齋此余嘗

撫琴賦詩于此所以名云見山岡下有池水入于坤維
跨流為門水由門縈紆曲引至于岡側東為谿薄于巽
隅池中有亭曰墨池余嘗集百氏妙迹于此而展玩也
池岸有亭曰筆谿其清可以濯筆谿旁有釣渚其靜可
以垂綸也釣渚與邃經堂相直焉有三橋度谿而南出
者謂之招隱絕池至于墨池亭者謂之幽興循岡北走
度水至于西圃者謂之西礪西圃有艸堂艸堂之後有
華嚴菴艸堂西南有土而高者謂之西邱其木則松檜

枯栢黃楊冬青猗桐檉柳之類柯葉相蟠與風颺颺高
或參雲大或合抱或直如繩或曲如鉤或蔓如附或偃
如傲或參如鼎足或並如釵股或圓如蓋或深如幄或
如脫虬臥或如驚蛇走名不可以盡記狀不可以殫書
也雖雪霜之所摧壓颺霆之所擊撼搓牙摧折而氣象
不衰其花卉則春繁秋孤冬曄夏蒨珍藤幽藹高下相
映蘭菊猗猗蒨蒨蒼蒼碧碧蘚覆岸慈筠列砌藥錄所收
雅記所名得之不為不多桑柘可蠶麻紵可緝時果分

蹊嘉蔬滿畦標梅沉李剥瓜斷壺以娛賓友以約親屬
此其所有也余于此園朝則誦義文之易孔氏之春秋
索詩書之精微明禮樂之度數夕則泛覽羣史歷觀百
氏考古人是非正前史得失當其暇也曳杖逍遙陟高
臨深飛翰不驚皓鶴前引揭厲于淺流躊躇于平皋種
木灌園寒耕暑耘雖三事之位萬鍾之祿不足以易吾
樂也然余觀羣物無一物非空者安用拘于此以自贅
耶異日子春之疾瘳尚平之累遣將扁舟河海浮遊山

嶽莫知其所終極雖然此圃者先光祿之所遺吾致力
于此者久矣豈能忘情哉凡吾衆弟若子若孫尚克守
之母顏爾居母伐爾林學于斯食于斯是亦足以爲樂
矣余豈能獨樂哉昔戴顓寓居魯望歸隱遺跡迄今猶
存千載之後吳人猶當指此相告曰此朱氏之故圃也
元豐三年十二月朔吳郡朱伯原記

蘇州學記

元祐五年歲次庚午
秋七月甲子朔建

兩儀定位禮義興矣五教既敷學校立矣禮義不可一

日忘故學校不可一日廢也昔唐虞三代之盛未嘗不以建學嚴師為先務內則王庶子羣后卿大夫元士之適子其入以齒外則塾黨鄉遂之間其教以時下至于四方萬國之遠皆命之為庠序其法詳矣故始于直寬剛簡而防其失次以歌詩音律而致其和者此堯舜之典樂所以教也以智仁聖義忠和為之德孝友睦婣任恤為之行禮樂射御書數為之藝此周大司徒卿大夫所以教也上之所以教于下下之所以應于上若置郵

而傳命也若決江河莫之能禦也書美萬邦黎獻可以
共為帝者之臣詩稱成人有德小子猶有所造其材之
可用如此蓋當是時風化行習俗美人人有士君子之
器雖畎畝之賤山林之幽亦為仁義之所漸摩禮樂之
所陶染咸入于善且免而不忘敬敦

詩音徒
端切

葦而不忍

踐豈有暴亂萌于心姦宄害于事者哉此建學之效也
王道衰禮義廢獨一魯侯能修泮宮因馘之獻猶不離
此邦人頌焉戰國之際孟軻猶歷說時君謹庠序之教

申孝悌之義終潤而不用習大亂迄于秦棄儒任法民不知學而疾視其君蠱起而墟秦矣漢方休息元元未遑先王之教世宗奕奕首善于京其臣有若董仲舒者為大夫文翁者為守吏皆尚儒術廼詔置博士弟子之員而立學校官于郡國其課士必以經藝蓋士不素養則德難遽考使因學以知經因經以會道庶乎有成矣東京內盛三雍之儀不及于外而鄭興賈逵馬融鄭康成之徒繼為人師以經相授囊括六典六學寔明是以

時政雖亂于上而義士交起于下抗節濡足用救陵夷
漢賴以不亡者百餘年魏分晉弱事不足道唐之文物
盛矣而尚賦以取人世薄經術以文辭相夸夫文所以
宣志也觀其文則志可度哉故元臣碩老多由詞科以
出神宋受命遏亂興治乘輿嘗幸國庠親臨講席是時
勲臣宿將並列藩鎮庠序雖未興而鴻儒碩生聞風以
起有若戚堅素在睢水种明逸在終南皆聚徒講授髦
俊歸之其後陪京方面之守臣稍請興學自景祐中范

文正公作學于吳又創于潤滕子京建于湖慶歷之盛
文正公叅豫機政而石守道孫明復首居太學是時仁
宗開天章閣召輔臣八人問以治要文正公復以學校
為對于是詔天下皆立學神宗之時立三舍法置方郡
教官皆試可而後授今上嗣位申命近臣薦堪內外學
官者方聖朝承平之久而長育之勤雖瀕海裔夷之邦
孰未垂髫之子孰不抱籍綴辭以干榮祿哀然而赴詔
者不知其幾萬數蓋自昔未有盛于今也凡命教之法

以經術觀其學以詞賦觀其文以論策觀其智所取兼
于漢唐而德行道藝之士參出乎其中矣然欲合二帝
三代之法使人人有士君子之器皆在吾君相之所潤
色也始姑蘇郡城之東南有夫子廟所處隘陋及文正
公以天章閣待制守是邦欲遷之高顯相地之勝莫如
南園南園者錢氏之所作也高木清流交蔭環醜乃割
其巽隅以建學廣殿在左公堂在右前有泮池旁有齋
室是時學者才逾二十人或言其太廣文正曰吾恐異

日以為小也于是召安定先生首當師席英才雜還自遠而至厥後登科者逾百數多致顯近由景祐迄今五十餘載學者倍蓰于當時而居不加闕也某適忝命掌學周視黌舍傾彫褊迫寒薄暑歊諸生病之來者無所處乃與同僚議請南園隙地以廣齋廬屢諭于郡守部刺史病財用之不給會文正之子兵部侍郎公純禮以厚德遠業見器朝廷出自奉常制置江淮六路漕事擁使者節過鄉上冢廼以學舍之微白公公既即學拜文

正公遺像延見諸生感慨陳迹即奏言蘇潤之學皆先
臣所建後人久不葺而齋室不庇風雨講習無所願給
錢修廣而今太守諫議王公在潤先以潤學為請有詔
給以度牒十紙充其費時元祐四年五月也前守戶部
劉公程選官治役度用賦工會王公自潤易蘇下車三
日臨視興作命之裁築填汙立基如請之素益以闕賦
之財助以亡命之卒完舊創新累工逾萬期歲而告成
不以一分取于民公堂廓如也廊廡翼如也齋室凡二

十二而始作者十為屋總百有五十楹而初建者三之一立文正公安定先生祠宇遷校試廳于公堂之陰榜曰傳道庖池澡室莫不嚴潔竊然而深曠然而明其處也寬其容也眾南楹引愛日北牖延清風咸適其宜矣凡學田之佃于人而隱沒者為之括而實之屋之僦于市而已壞者為之新而復之養士之資由此不匱皆太守所命也夫儒者蚤暮孜孜從事典籍苟居處不佚饌糧不豐而責其勤難矣故嚴其宮足其餉所以教也且

吳為東南都會自泰伯三邇天下延陵脫屣千乘言偃
以學稱嚴助以文著朱張顧陸世多顯者此誠禮義之
區儒雅之藪也今夫興學以教者豈徒貴其中程課躡
科等哉必也為文足以貫道為經足以通理立于朝廷
則謀王體贊國論仕于郡縣則宣惠澤興事功其餘風
所扇猶將使人老老而幼幼夫夫而婦婦室有忠信俗
有廉潔然後知新學之作豈專以棟宇為哉君子為兵
部公善述其先志可謂之孝正諫公樂成于教育可謂

之仁唯孝與仁于是著矣正諫公以道立朝忠貞不回
其治吳期月吏民威其德而安其政畫坐郡閣事至即
決已而與賓客雍容笑語沛然有餘裕方學之成吳人
莫不欣悅鼓舞望車馬之來而樂芹藻之采也見命作
記確辭莫獲輒系之聲詩刻之隆碣以告于後世云詩
曰

惟帝光宅錫民保極曷以臻茲惟孝之積降漢迄唐以
經以文元臣碩老世偉其人天保神宋七聖繼德右儒

尚文經緯九域肇開雍庠周設泮序興賢舉能歲幾千
數維吳有學文正是興師明友諒俊傑紹登歷載五紀
烝然髦士將圮其隘士罔能止翼翼膚使繼述其先建
言于朝授牒易泉邦牧承命以新以廣匪憚厥勤資我
教養高堂邃廡環闔羣齋潭潭其深濟濟其來孰居是
堂勿尸厥職亶爾誠心傳道解惑凡處是齋勿嬉勿息
道德淵源辭章潤色拱把之木長而參雲涓勺之水滌
而流坤匪學之設惟材之成是明是翼永贊丕平

賢行齋記

余少時思友天下賢士而抱病退居所遇者少然亦得數人焉其後有以才業步廊廟有以風采名當世者由是自信其取友不謬也既歸吳下吳為俊英藪澤所交者多善士或愛其學問或偉其辭章或嘉其行義或奇其志氣然後取之也晚得一人曰林德祖盡仁于親可謂之孝推爵于弟可謂之友博洽慕向雄論著望韓杜真可以畏而仰也始德祖顧余于林園之間一見躍然

以喜恨相見之晚也後數年復會于吳聽其言而說玩其文而服其相期如金石相和如埴篲也或問曰子之知德祖者深矣其詳可得而聞歟曰余言非妄也德祖少而警敏生數歲其伯父今天章公嘗獲一鑑背題龍朔德祖在旁曰此唐高宗時所鑄也公中奇之他日諸父有所見問之即對皆與史合孔常父掌揚州學德祖年十七試為諸生冠會神宗初罷尊號坐客或論尊號之所起德祖避席曰宇文周宣帝生號天元唐高宗自

稱天皇自是美稱寢多矣常父即取筆札命書之擢為都講辭不受元豐中試太學第一司業博士以謂三舍之置未有此作也厥後試二浙江東漕司嘗在魁選又用賦舉開封名第五而連見黜于禮部一時諸公幸得之以為功見其失也莫不驚愕嗟惜嗚呼近世以糊名取士雖曰至公其弊至于失才如此可為太息先公太僕當任子德祖以遜其第碩孺太僕不許德祖即取奏牘以碩孺名上之會有詔任子必以長幼為之序德祖

遺書諫官曰某當以廢疾自棄矣是時岑巖起仲子亦
推與叔弟德祖聞之諭巖起建請乃得改法碩孺遂得
入仕太僕捐館河東德祖號頓幾不勝間闕扶護下太
行而歸未卒哭葬吳西山所以奉終顯親之事無不自
竭鄉里敬服其平居論議必以帝王之佐為師而頗喜
賈誼汲黯諸葛孔明魏鄭公之為人其志可知也嘗擬
作節度留後制辭其舅氏今丞相蘇公見之曰此非盡
讀一部唐史不能知此也天章公當世大儒視士大夫

少所許可于誌太僕廼稱德祖曰好學有賢行夫仲尼
獨賢顏子且嘉其好學楊子賢顏淵黔婁四皓韋成以
謂為人所不能為然則賢之實豈易許哉天章之言何
敢私也余之譽德祖非過也問者曰子之言然余既荅
問一日過德祖遂名其所居之齋曰賢行雖德祖謙不
敢受然使鄉里之士慕其賢而勉于善豈無補哉且欲
當路者聞之儻以推轂人物為己任則德祖豈宜久蟠
于閭巷哉遂作記云元祐癸酉三月望泮池書

儒學林公祠堂記

寶元中集賢校理儒學林公以大理評事知長興縣公
之道德文章名震天下擢第甲等試才茲邑始時邑人
懵不知學公闢庠校躬自教飭相率以從俗用丕變勸
課農桑開浚圳澮凡下教令稚老歡呼政成逾年陟守
于連邑人懷思生立祠宇歲久闇故又繪而新之逮元
祐二年丁卯公之元子朝奉大夫集賢殿修撰公出典
斯郡眷言故邑西嚮懷慕四年正月徙鎮金陵解印之

初即走祠下饋羞捧奠感咽涕洟自邑大夫縣佐衆士
胥吏父老百輩咸列于位退而咨嗟填道溢郭曰惟賢
令君克祐我民民思不忘願見其子惟公元子復守吾
土嗣其教令如公再至敬省顯考慰民之思父子相望
歷載五十象賢合德以福此邦載懷載承永永無斁發
于歌咏形于翰墨歡聲洋洋旁溢淪壤已事言旋次于
中吳夫為政之感至于立祠秉德之報至于有後民之
懷仁天之福善于是信矣公名在國史澤在黎庶有子

六人既顯者四貴胄濟濟流慶無窮譁然光華孰與為
媿昔甘棠之愛相戒勿剪緇衣之敝猶願改為居則見
思服則見美林氏世濟令德罔愧古人詩云惟其有之
是以似之豈不休哉長城士民咸願刻石以告于後而
長文居于吳下親見其事辭而記之使來者知所勸慕
云是年三月甲戌長文記

蔡公展先塋記

代光祿作

蔡氏之先世有名德著于睢陽自少保公在蜀以一城

挫亂兵民不喋血太傅公雖屈卑位拯危滌冤無憚苛
吏君子知其有後是生侍郎資政二公侍郎為宋甘盤
壽不副德資政沈謀遠畧器兼將相向者出擁帥旄料
敵制勝夏戎遁死莫敢犯塞及夫運籌禁幄助新百度
河隍千里復為我疆憂勞機衡疾起無妄懇祈南臺用
自怡養神祐氣沖逾歲乃愈丙辰孟冬朔日維申孝思
恭勤親拜先冢既獻烈考即奠元昆徘徊舊植之松柏
歷覽新成之梵宇華胄詵詵以引以翼已事旋旆都人

嘆美蓋公之此行榮與感并何者位至于樞廷年逾于
耳順功名赫然書在史冊而諸子顯仕諸孫善學朱金
印組爛其盈門此衣冠之華觀至美也可不謂榮乎朝
霜零空拱木飛葉莫遑蘭陔之養無復棣華之照而復
朱顏易流素髮垂領覽物興念多為陳迹臨觴引滿罕
逢故人此人世之深悲永傷也可不謂感乎然公智窮
物理心脫羣累雖在閑佚乃誠本朝方當蠲感慨之懷
圖榮盛之報使大和內充微疚良已天錫眉壽永弼太

平仰悅先公之靈俯協多士之望不亦偉哉某視太傅
為外舅謹以是日同拜墓下哀念平昔喜觀盛事因書
之屋壁以貽後來時熙寧九年也朝散大夫守光祿卿
前知舒州軍州事兼管内勸農使上輕車都尉借紫朱
公綽謹記

樂圃餘藁卷六